



# Cari aksi panas badan



## ■ Johnathan harap dapat sertai empat siri kejohanan Piala Dunia

Oleh Aziman Rosdi  
aziman@hmetro.com.my  
Kuala Lumpur

Selepas melakar kejutan dengan meraih pingat emas di Kejohanan Menembak Kelayakan Olimpik di New Delhi, India Isnin lalu, penembak elit negara Johnathan Wong (*gambar*) berharap dapat beraksi dalam empat siri kejohanan Piala Dunia tahun ini sebagai pemanas badan sebelum ke Sukan Olimpik Rio Ogos nanti.

Johnathan yang memenangi acara 10m Air Pistol Individu Lelaki di kejohanan kelayakan itu sekali gus menempah tiket ke Rio berkata, dia mahu-

kan lebih banyak pendedahan di kejohanan kompetitif tahun ini berbanding latihan di luar negara.

“Setakat ini segala perancangan belum pasti kerana saya masih perlu berbanding dengan jurulatih Haslim Desa dan pihak persatuan. Jika mahu berlatih di luar negara mesti perlu tujuan yang kukuh bagi memastikan latihan itu tidak sia-sia. Kalau dapat berlatih bersama penembak handalan luar negara pasti

lebih bagus.

“Tapi pada saya, menyertai kejohanan di luar negara lebih baik bagi persediaan saya ke Sukan Olimpik Rio. Tahun ini ada empat Kejohanan Siri Piala Dunia di Bangkok, Thailand pada Mac, Rio de Janeiro, Brazil (April), Munich, Jerman (Mei) serta Azerbaijan (Jun) dan saya harap dapat diberi peluang,” katanya kepada Arena Metro semalam.

Johnathan, 24, kini sedang bercuti bersama keluarga di

Melaka sempena sambutan Tahun Baru Cina selepas pulang dari New Delhi dan akan kembali memulakan latihan pada 15 Februari.

Bagi memastikan persiapan terbaik sebelum beraksi di Sukan Olimpik Rio, dia bercadang untuk menangguhkan pengajiannya di Universiti Putra Malaysia (UPM) tahun ini.

“Saya bercadang untuk menangguhkan pengajian saya tahun ini, kerana saya fikir adalah baik untuk saya memberikan tumpuan sepenuhnya kepada latihan sebelum ke Sukan Olimpik,” kata penuntut jurusan Kejuruteraan Aeroangkasa itu.

**FAKTA**  
Empat Kejohanan Siri Piala Dunia di Thailand, Brazil, Jerman dan Azerbaijan